

- आतूणी एशिया मांय उपजा हालात बीचे सरकार देश मांय हर भांत री साखां रा बीज अर खेती-बाड़ी मांय काम आवण वाळा रसायन ज़रूरी तादाद मांय मौजूद व्हेवण रो भरोसो दिरायो ।
- नुवो माली साल सरु व्हयो- आज पहला दिन आयकर कानून- 2025 लागू व्हेवण सागे ई और केई बदलाव व्हया ।
- केंद्र सरकार राजस्थान समेत आठ राज्यां ने गांवाई हलकां मांय विकास रा कामां सारु डोढ़ हजार करोड़ रुप्या ऊँ बत्ती रकम जारी कीनी ।
- मुख्यमंत्री भजन लाल शर्मा कह्यो- राज्य री मौजूदा सरकार हाल तांई सवा लाख नौकरियां दीनी ।
- प्रदेश मांय 262 ठौड़ां करीब 6 सौ ईवी चार्जिंग टेशन खोल्या जावेला ।

000

सरकार आज भरोसो दिरायो के देश मांय हर भांत री साखां रा बीज ज़रूरी तादाद मांय मौजूद है । आतूणी एशिया मांय उपजा हालात रा बारा मांय नई दिल्ली मांय राख्यी ज्यी अंतरमंत्रालयी मीटिंग मांय कृषि अर किसान कल्याण मंत्रालय री अपर सचिव डॉ. मनिंदर कौर द्विवेदी बतायो के देश मांय खरीफ री साखां सारु 185 लाख क्विंटल ऊँ बत्ता बीज उपलब्ध है । अपर सचिव बतायो के देश मांय खेती-बाड़ी मांय काम आवण वाळा रसायन ई ज़रूरी तादाद मांय मौजूद है । मीटिंग मांय पेट्रोलियम अर प्राकृतिक गैस मंत्रालय री संयुक्त सचिव सुजाता शर्मा कह्यो के सरकार आवता दो महीनां सारु ज़रूरी काचा तेल री पूर्ति तैय करण री व्यवस्था कीनी है । सुजाता शर्मा बतायो के देश मांय तेल साफ़ करण रा कारखाना पूरा बूता सागे काम कर रह्या है । वे कह्यो के दुनिया रा बाजार मांय तेल रा मोल मांय उतार-चढ़ाव ऊँ देश री जनता ने बचावण सारु सरकार पेट्रोल अर डीजल माथे एक्साईज ड्यूटी कम कीनी है ।

000

केंद्र सरकार गांवाई हलकां मांय विकास रा कारज सारु राजस्थान समेत आठ राज्यां ने डोढ़ हजार करोड़ रुप्या ऊँ बत्ती रकम जारी कीनी है । पंद्रहवां वित्त आयोग री सिफारिशां रे मुजब आ रकम ग्राम पंचायतां री जरूरतां पूरी करण अर विकास रा कारज सारु काम ली जावेला । पंचायती राज मंत्रालय रे मुजब ई बजट रो एक हिस्सो खास तौर ऊँ साफ-सफाई, पीवण रा पाणी री पूर्ति, बिरखा रो पाणी भेळो करण अर कचरा प्रबंधन सरीखा बुनियादी सुबीता मुहैया करावण माथे खर्च कर्यो जावेला ।

000

आज नुवो माली साल 2026-27 सरु व्हे ग्यो । ई सागे ई आज आयकर कानून-2025 रा प्रावधान ई लागू व्हे ग्या । ओ कानून 1961 रा इन्कम टैक्स एक्ट री ठौड़ लागू व्हयो है । ई सागे ई भारतीय रिज़र्व बैंक रा हुकम रे मुजब आज ऊँ देश मांय डिजिटल तरीका ऊँ लेनदेन सारु टू-फैक्टर ऑथेंटिकेशन रा मानदंड पूरा करणा व्हेला । तेल कंपनियां ई कारोबार मांय काम आवण वाळी उन्नीस किलोग्राम वज़न री गैस री टंकियां रो मोल एक सौ पिचानवे रुप्या बधा दीनो है । सालाना फास्टैग पास सारु ई आज ऊँ तीन हजार पिचहत्तर रुप्या देवणा व्हेला ।

रेलवे ई आज ऊँ रिजर्वेशन चार्ट रेलगाड़ी रा रवानगी टेम ऊँ आठ घंटा पैली बणावणो सरु कर दीनो है, जो चार घंटे पैली बणतो हो । उत्तर पश्चिम रेलवे रा मुख्य जनसंपर्क अधिकारी अमित सुदर्शन बतायो के इण ऊँ मुसाफिरां ने टिकट कन्फर्म व्हेवण री टेमसर ठा पड़ सकेला ।

000

देश मांय रहवासियां री गिणती रा काम जनगणना 2027 रो पहलो दौर आज सरु व्हे ग्यो । दुनिया री सब ऊँ मोटी जनगणना रा पहला दौर मांय मकानां री लिस्ट बणायी जा रही है । पहली दफा डिजिटल तरीका ऊँ करायी जा रही ई जनगणना मांय स्व-गणना ई करायी जा सके है । राज्य मांय स्व-गणना एक ऊँ 15 मई तांई स्व-गणना करायी जा सकेला । स्व-गणना एक सुरक्षित वेब-आधारित सुबीतो है जिण रे जरिये घर-घर सर्वे ऊँ पैली 16 भाषावां मांय जाणकारी ऑनलाइन तरीका ऊँ दर्ज कराई जा सके है । भारत रा महा पंजीयक अर जनगणना आयुक्त मृत्युंजय कुमार नारायण आकाशवाणी सागे खास बातचीत रे दौरान डिजिटल जनगणना रा फायदां री जाणकारी दीनी ।

मुख्यमंत्री भजनलाल शर्मा कह्यो है के स्कूलां विद्यार्थियां मांय नैतिक मूल्य अर संस्कार विकसित करण रा खास केंद्र हैं। श्री शर्मा आज जयपुर रा राजापार्क हलका री एक गैर-सरकारी स्कूल मांय नुवा बणायी ज्या बहुउद्देशीय सभागार ने जनता ने संपण रे मौके बोल रह्या हा। मुख्यमंत्री बच्चां रो व्यक्तित्व बणावण मांय अध्यापकां रा काम ने खास बतायो। वे कह्यो के राज्य सरकार भणायी-लिखाई ने मजबूत बणावण अर नौजवानां रा सपनां पूरा करण माथे खास ध्यान दे रही है।

वे कह्यो के राज्य मांय मौजूदा सरकार रा हाल तांई रा कार्यकाल रे दौरान एक ई भर्ती परीक्षा रो पेपर लीक नी व्ह्यो है अर नौजवानां ने दस लाख नौकरियां मुहैया करावण रा लक्ष्य सागे हाल तांई सवा लाख नौकरियां दी जा चुकी है।

000

राज्य री सरकारी स्कूलां मांय आज नुवो सत्र सुरू व्ह्यो। ई मौके सरकारी स्कूलां मांय विद्यार्थियां रो तिलक लगा र अर माळा पहरा र स्वागत करी ज्यो। सरकारी स्कूलां मांय विद्यार्थियां ने मुफ्त किताबां दे र कोर्स री जाणकारी दीरीजी। बालोतरा जिला रा कोटेसो अर बागावास री सरकारी मिडिल स्कूलां मांय प्रवेश उत्सव मणायी ज्यो, जठे नुवा विद्यार्थियां रो मुँह मीठो करा र वां ने दाखिलो दियो ज्यो। झुंझुनू रा बीबासर मांय पीएमश्री महात्मा गांधी राजकीय विद्यालय मांय पहला ही दिन सत्ताईस विद्यार्थी दाखिलो लीनो। स्कूल रा प्रीसिपल विजय बेनीवाल बतायो के नामांकन बधावण सारू अध्यापक लारला एक पखवाड़ा ऊँ घर-घर जा र जाग जगा रह्या हा।

0000

राजस्थान हाई कोर्ट पाली जिला रा जवाई हलका मांय तेंदुआ अर दूजा जंगली जिनावरां रा कुदरती रहवास री हिफाजत सारू रात री बगत सैलाणियां री आवण-जावण माथे रोक लगा दीनी है। अदालत रा हुकम रे मुजब अब जवाई हलका मांय सैलाणी संवारे छह ऊँ सिंज्यां सात बज्यां तांई सैर कर सकेला। रात री बगत सैर-सपाटा माथे रोक सागे ही जंगली जिनावरां ने हेरबा सारू ड्रोन, स्पॉटलाइट अर टॉर्च काम लेवण माथे ई रोक लगा दीरीजी है।

000

रेल मंत्री अश्विनी वैष्णव कह्यो है के रेलवे ने दिया ज्या रिकॉर्ड बजट ऊँ देश रा हर रहवासी, खासकर गरीब अर मझला दर्जा री जनता ने फायदो मिल रह्यो है। वे आज लोकसभा मांय प्रश्नकाल रे दौरान पूरक सवालां रो जवाब देता थकां कह्यो के लारला दस बरसां मांय रेलवे मांय करी ज्या खास निवेश ऊँ देश रा हर रहवासी ने सीधो फायदो मिल्यो है।

000

हनुमानगढ़ जंक्शन हलका री सादुल ब्रांच नहर मांय डूब जावण ऊँ आज दो जणां री मौत व्हे ग्यी। तीन जणा नहर मांय पूजन सामग्री बहवावण सारू गया हा, जो नहर मांय पड़ ग्या। जाणकारी मिलता ही जंक्शन थाना पुलिस अर आपदा प्रबंधन री टीम मौके पूग र तीन्यू ने बाहर निकाळ्या अर जिला अस्पताल पूगाया। अस्पताल मांय डॉक्टर दो जणां रे मरण री जाणकारी दीनी।

000

भरतपुर जिला मांय ऊर्जा रा हलका मांय खुद रे पाण ऊबो व्हेवण अर हरित विकास सारू पीएम सूर्य घर अर कुसुम योजना रा तैत सूरज री रोशनी ऊँ बिजली बणावण री इक्कीस मेगावाट बूता री मशीनां लगावणो तैय करी ज्यो है। ई रा तैत भरतपुर, नदबई, वैर, बयाना, रूपवास अर छोंकरवाड़ा मांय एक हजार नौ सौ अट्टाइस सरकारी भवन चुणी ज्या है। म्हाणा भरतपुर खबरनवीस बतायो के हाल तांई बीस सरकारी भवनां माथे सोलर पैनल लगा दिया ज्या है, जद के साठ दूजा भवनां माथे अ मशीनां लगावण रो काम चाल रह्यो है।

000

ई साल मार्च महीना मांय वस्तु अर सेवा कर -जीएसटी री मद मांय लारला साल रा इण ई महीना री तुलना मांय 8 दशमलव 8 फीसदी बधोतरी व्ही है। वित्त मंत्रालय रे मुजब जी.एस.टी रे पेटे दो लाख करोड़ रुप्या ऊँ बत्ती रकम भेळी करी ज्यी है।

000

केंद्र सरकार 'प्रधानमंत्री ई-ड्राइव' योजना रा तैत राजस्थान सारू 81 करोड़ रुप्या ऊँ बत्ती रकम मंजूर कीनी है। ई योजना ऊँ प्रदेश मांय बैटरी ऊँ चालण वाळी गाड़ियां सारू चार्जिंग टेशन बणाया जावेला। राजस्थान अक्षय ऊर्जा निगम री ओर ऊँ प्रदेश मांय 262 ठौड़ां जनता सारू 591 चार्जिंग टेशन बणाया जावेला। ऊर्जा मंत्री हीरालाल नागर कोटा मांय खबरनवीसां सागे बातचीत करता थकां इण ने राज्य मांय प्रदूषण फैलायां बिना आवण-जावण अर आब-ओ-हवा ने बेहतर बणावण री दिशा मांय मोटो जतन बतायो।